

ՄԵՐՁԱՎՈՐ ԱՐԵՎԵԼՔԻ ՀԱՅ ԱՎԵՏԱՐԱՆԱԿԱՆ ՀԱՄԱՅՆՔՆԵՐԸ

*Վահրամ Հովյան**

Ներկայումս հայ ավետարանական համայնքներ կան Մերձավոր Արևելքի 6 երկրներում՝ Լիբանանում, Սիրիայում, Թուրքիայում, Իրանում, Իրաքում և Եգիպտոսում¹: Կիրառական տեսանկյունից դրանց ուսումնասիրությունը կարևորվում է հետևյալ նկատառումներով.

- Մերձավոր Արևելքը փոթորկահույզ տարածաշրջան է: Նորագույն պատմության ընթացքում ներքին և արտաքին պատերազմները գրեթե միշտ ուղեկցել են այս տարածաշրջանի երկրներին՝ արաբա-իսրայելական հակամարտություն, լիբանանյան քաղաքացիական պատերազմ (1975-90թթ.), իրաք-իրանական պատերազմ (1980-88թթ.), Օսցի պատերազմ (1991թ.), 2003թ. իրաքյան պատերազմ, «արաբական գարուն» (2011թ.) և այլն: Այս իրադարձություններն իրենց ազդեցությունն են թողնում տեղի հայ համայնքների վրա, որոնց մի մասն են կազմում հայ ավետարանականները:
- Մերձավոր Արևելքն աշխարհագրորեն խիստ մոտ է Հայաստանին, իսկ վերը թվարկված երկրներից երկուսը՝ Թուրքիան և Իրանը, անմիջականորեն սահմանակից են վերջինիս: Հետևաբար, այդ տարածաշրջանում կատարվող իրադարձություններն իրենց ուղղակի և անուղղակի ազդեցությունն են թողնում ոչ միայն տեղի հայ համայնքների, այլև Հայաստանի վրա: Իսկ հայ ավետարանական համայնքները որոշակի գործոն են առանձին երկրների, ինչպես նաև տարածա-

* «Նորավանք» ԳԿՀ Հայագիտական կենտրոնի փորձագետ:

¹ Թեև Մերձավոր Արևելքի Հայ Ավետարանական եկեղեցիների միությունն ընդգրկում է նաև Հունաստանի և Ավստրալիայի հայ ավետարանական համայնքները (տե՛ս http://www.uaecne.org/index.php?option=com_content&view=section&layout=blog&id=3&Itemid=6), սակայն սույն հետազոտության մեջ մենք առաջնորդվել ենք զուտ աշխարհագրական սկզբունքով՝ դիտարկման ծիրում ներառելով միայն մերձավորարևելյան տարածաշրջանում գտնվող երկրների հայ ավետարանական համայնքները:

շրջանային քաղաքականության մեջ, որի ճիշտ և նպատակային օգտագործումը կարող է բավական արդյունավետ լինել:

Ներուժի գնահատման փորձ

Մերձավոր Արևելքի հայ ավետարանական համայնքների ներուժն արդյունավետ և նպատակային օգտագործելու համար նախ անհրաժեշտ է գնահատել այն, ինչն իրականացվել է հետևյալ մեթոդաբանությամբ: Առանձնացվել են երկու չափորոշիչ՝ մարդկային և կազմակերպչական, որոնք էլ իրենց հերթին բաժանվել են ենթաչափորոշիչների: Դրանց հիման վրա Մերձավոր Արևելքի հայ ավետարանական համայնքները, ըստ ներուժի, դասակարգվել են երեք խմբի՝ մեծ, միջին և փոքր ներուժ ունեցող համայնքներ: Յուրաքանչյուր ենթաչափորոշիչի պարագայում կիրառվել է դրան համապատասխան չափանիշ:

1. *Մարդկային* չափորոշիչի շրջանակներում առանձնացվում են հետևյալ երկու ենթաչափորոշիչները.

Քանակը: Սույն ենթաչափանիշով համայնքների դիտարկման դեպքում որպես մեծ ներուժ ունեցող համայնքներ առանձնացվել են նրանք, որոնց թվաքանակը գերազանցում է 2000-ը: Միջին ներուժ ունեցող համայնքներ են համարվել նրանք, որոնց թվաքանակը գտնվում է 1000-2000-ի սահմաններում: Եվ վերջապես այն համայնքները, որոնց թվաքանակը ցածր է 1000-ից, համարվել են փոքր ներուժ ունեցող համայնքներ:

Ըստ այդմ՝ Լիբանանի, Սիրիայի և Թուրքիայի հայ ավետարանական համայնքները հանդիսանում են մեծ ներուժ ունեցող: Լիբանանում և Սիրիայում հայ ավետարանականների թվաքանակը կազմում է 4-5 հազարական մարդ:

Մարդկային թվաքանակի առումով հետաքրքիր է Թուրքիան, որտեղ, հայ ավետարանականների թվաքանակի հետ կապված, տեղի են ունենում հակոտնյա գործընթացներ: Մի կողմից՝ տիրող կրոնական և ազգային անհանդուրժողականության մթնոլորտը հանգեցնում է նրանց թվաքանակի նվազմանը: Ներկայումս, ըստ որոշ տվյալների՝ հայ ավետարանականների թվաքանակը Թուրքիայում կազմում է մոտ 500 մարդ [1, էջ 185; 2, p. 9]:

Մյուս կողմից, սակայն, վերջին շրջանում Թուրքիայում կրկին լայն թափ է ստացել քրիստոնեական միսիոներությունը, որի արդյունքում տեղի է ունենում այդ երկրի քրիստոնեացման գործընթաց: Գերմանական և այլ միսիոներական կառույցների գործունեության հետևանքով Թուրքիայում տարածում է ստանում նաև բողոքականությունը, որի ալիքն ընդգրկում է նաև նախկինում իսլամացված հայերի սերունդներին: Օրինակ, ըստ Թուրքիայի բողոքական կազմակերպությունների տվյալների՝ Ադանայի բողոքականների մեջ մեծ թիվ են կազմում հայկական ծագում ունեցողները [3]: Իսկ իսլամացված հայերի սերունդների մեջ կրոնադարձությունը (վերաքրիստոնեացումը՝ բողոքականացումը) զուգորդվում է նաև ազգային ինքնագիտակցության վերազարթոնքով, ինչը նպաստում է հայ ավետարանականների թվաքանակի ավելացմանը:

Թե որքան է ներկայումս բողոքականություն ընդունած՝ նախկինում իսլամացված հայերի սերունդների թվաքանակը, դժվար է ասել, քանի որ նրանք բավական խայտաբղետ մարդկային հանրույթ են ներկայացնում: Նրանց թվաքանակի հստակ որոշման հետ կապված դժվարություններն էլ առկախում են Թուրքիայում հայ ավետարանականների թվաքանակի հստակեցման հարցը: Այնուամենայնիվ, նկատի ունենալով նախկինում մեծ թվով իսլամացված հայերի սերունդների բողոքականացումը՝ կարելի է ենթադրել, որ այդ երկրում հայ ավետարանականների ընդհանուր թվաքանակն անցնում է 2 հազարից:

Իրանի հայ ավետարանական համայնքը, որի անդամների թիվը, մեր գնահատմամբ, կազմում է 1-2 հազ. մարդ, սույն ենթաչափորոշիչով դասակարգվում է որպես միջին ներուժ ունեցող համայնք: Իսկ Եգիպտոսի և Իրաքի հայ ավետարանական համայնքները, որոնցից յուրաքանչյուրի թվաքանակը ցածր է 1000-ից, համարվում են փոքր ներուժ ունեցող համայնքներ:

Սփռվածությունը: Համաձայն սույն ենթաչափորոշիչի՝ մեծ ներուժ ունեցող համայնքների շարքն են դասվում նրանք, որոնք բնակվում են տվյալ երկրի 2-ից ավելի շրջաններում: Երկու շրջաններում սփռված համայնքները դիտվում են որպես միջին, իսկ մեկ շրջանում կենտրոնացվածները՝ փոքր ներուժ ունեցող համայնքներ:

Դիտարկումները ցույց են տալիս, որ, ըստ սփռվածության, մեծ ներուժ ունեցող համայնքներ են Լիբանանի, Սիրիայի, Թուրքիայի և Իրանի հայ ավետարանական համայնքները: Վերջիններս սփռված են այդ երկրների հայաշատ բնակավայրերում: Լիբանանում հայ ավետարանականները բնակվում են մայրաքաղաք Բեյրութում, Բուրջ Համուդում, Էշրեֆիեում, Այնճարում և այլն: Սիրիայում նրանք թեև կենտրոնացած են հիմնականում Հալեպում, որտեղ էլ ապրում է ընդհանուր սիրիահայության մեծ մասը, սակայն հայ ավետարանական համայնքներ կան նաև Քեսապում, մայրաքաղաք Դամասկոսում, Հոմսում:

Սույն ենթաչափորոշիչով կրկին յուրահատուկ է Թուրքիան: 500 հայ ավետարանականները կենտրոնացած են Ստամբուլում: Իսկ միսիոներական գործունեության հետևանքով բողոքականությունը ընդունած՝ նախկինում իսլամացված հայերի սերունդները սփռված կերպով բնակվում են հիմնականում Արևմտյան Հայաստանի և Կիլիկիայի տարբեր շրջաններում: Այդպիսի խմբեր կան, օրինակ, Մալաթիայում (Արևմտյան Հայաստան), Ադանայում (Կիլիկիա) և այլն:

Իրանում հայ ավետարանականները սփռված են մայրաքաղաք Թեհրանում, Նոր Ջուղայում, Թավրիզում, Արալում, Համադանում [4, էջ 40]: Այնուամենայնիվ, նրանց գերակշիռ մեծամասնությունը կենտրոնացած է Թեհրանում [մանրամասն տե՛ս 5, էջ 33]:

Իսկ Եգիպտոսի և Իրաքի հայ ավետարանական համայնքները կարելի է անգամ անվանել համապատասխանաբար՝ Ալեքսանդրիայի և Բաղդադի հայ ավետարանական համայնքներ, քանի որ, բացի այդ բնակավայրերից, հայ ավետարանականների այլ բնակավայրեր այդ երկրներում չկան: Ասվածը թույլ է տալիս այդ համայնքները համարել փոքր ներուժ ունեցող:

2. Կազմակերպչական չափորոշիչի շրջանակներում առանձնացվում են հետևյալ չորս ենթաչափորոշիչները.

Քանակը: Սույն ենթաչափորոշիչով գնահատելիս որպես մեծ ներուժ ունեցող համայնքներ են գնահատվում 10-ից ավելի կազմակերպչական կառույցներ ունեցողները: Որպես միջին ներուժ ունեցող համայնքներ գնա-

հատվում են նրանք, որոնց կազմակերպչական կառույցների թվաքանակը տատանվում է 5-10-ի սահմաններում: Եվ վերջապես փոքր ներուժ ունեցող համայնքներ են դիտվում նրանք, որոնց կազմակերպչական կառույցների թիվը փոքր է 5-ից:

Սույն ենթաչափորոշիչի տեսանկյունից Լիբանանի և Սիրիայի հայ ավետարանական համայնքները, ունենալով համապատասխանաբար 24 և 28¹ կազմակերպչական կառույցներ, դիտվում են որպես ուժեղ համայնքներ:

Նրանց 7 կազմակերպչական կառույցով² հաջորդում է Իրանի հայ ավետարանական համայնքը՝ գնահատվելով որպես միջին ներուժ ունեցող համայնք:

Թուրքիայում երբեմնի բազմաթիվ եկեղեցիների, ինչպես նաև հարուստ կալվածքների (դպրոցներ, որբանոցներ և այլն) փոխարեն, ներկայումս գործում են ընդամենը երկու հայ ավետարանական կառույցներ՝ Ստամբուլի Գեդիքփաշա և Բեյոլլու թաղամասերի Հայ Ավետարանական եկեղեցիները³:

Ինչ վերաբերում է Եգիպտոսի և Իրաքի հայ ավետարանական համայնքներին, ապա Ալեքսանդրիայում գործում է մեկ (Ալեքսանդրիայի Հայ Ավետարանական եկեղեցին), իսկ Բաղդադում՝ երկու (Բաղդադի Հայ Ավետարանական եկեղեցին և Բաղդադի հայ ավետարանական ռադիոժամը) կազմակերպչական կառույց: Այսպիսով, Թուրքիայի, Եգիպտոսի և Իրաքի հայ ավետարանական համայնքները, ըստ կազմակերպչական չափորոշիչի քանակական ենթաչափորոշիչի, գնահատվում են որպես փոքր ներուժ ունեցող համայնքներ:

Բազմազանությունը: Այս ենթաչափորոշիչով դիտարկելիս մեծ ներուժ ունեցող համայնքներ են համարվում նրանք, որոնք ունեն երկու տեսակից ավելի կազմակերպչական կառույցներ: Երկու տեսակ կազմակերպչական կառույցներ ունեցող համայնքները համարվում են միջին, իսկ ընդամենը մեկ տեսակի կազմակերպչական կառույց ունեցողները՝ փոքր ներուժ ունեցող համայնքներ:

¹ St' u AMAA Directory 2012: Armenian Evangelical Churches, Institutions, Organizations, Pastors and Christian Workers Worldwide <http://www.amaa.org/Directory%20for%20website.pdf>

² Նույն տեղում:

³ Նույն տեղում:

Ըստ այդմ՝ Լիբանանի, Սիրիայի և Իրանի հայ ավետարանական համայնքները, ունենալով 4-5 տեսակի՝ ղեկավար, եկեղեցական, կրթական, սոցիալական, տեղեկատվական կառույցներ¹, համարվում են մեծ ներուժ ունեցող համայնքներ: Հատկանշական է, որ Իրանի հայ ավետարանական համայնքը, թեև կազմակերպչական կառույցների թվաքանակի առումով էապես զիջում է Լիբանանի և Սիրիայի հայ ավետարանական համայնքներին, սակայն տեսակային բազմազանությամբ հավասարվում է նրանց:

Իրաքի հայ ավետարանական համայնքը, ունենալով երկու տեսակի կազմակերպչական կառույց՝ եկեղեցական (Բաղդադի Հայ Ավետարանական եկեղեցին) և տեղեկատվական (Բաղդադի հայ ավետարանական հոգևոր ռադիոժամը), սույն ենթաչափորոշիչով համարվում է միջին ներուժ ունեցող համայնք:

Իսկ Թուրքիայի և Եգիպտոսի հայ ավետարանական համայնքները, որոնցում գործում են միայն մեկ տեսակի (եկեղեցական) կառույցներ, գնահատվում են որպես փոքր ներուժ ունեցող:

Սփռվածությունը: Այս ենթաչափորոշիչով հարցը դիտարկելիս որպես մեծ ներուժ ունեցող համայնքներ են գնահատվում նրանք, որոնց կազմակերպչական կառույցները սփռված են տվյալ երկրի երկուսից ավելի բնակավայրերում: Երկու բնակավայրերում սփռված կազմակերպչական կառույցներ ունեցող համայնքները համարվում են միջին, իսկ մեկ բնակավայրում կենտրոնացված կազմակերպչական կառույց(ներ) ունեցողները՝ փոքր ներուժ ունեցող համայնքներ:

Սույն ենթաչափորոշիչով մեծ ներուժ ունեն Լիբանանի և Սիրիայի հայ ավետարանական համայնքները, որտեղ կառույցների աշխարհագրական սփռվածությունը հիմնականում համընկնում է համայնքների աշխարհագրական սփռվածությանը: Լիբանանում հայ ավետարանական կազմակերպչական կառույցները սփռված են Բեյրութում, Բուրջ Համուդում, Էշրեֆիեում, Այնճարում և այլուր, իսկ Սիրիայում՝ Հալեպում, Քեսապում, մայրաքաղաք Դամասկոսում, Հոմսում²: Մյուս երկրների՝ Թուրքիա-

¹ Նույն տեղում:

² Նույն տեղում:

յի, Իրանի, Իրաքի և Եգիպտոսի հայ ավետարանական համայնքներում կազմակերպչական կառույցները կենտրոնացած են մեկ բնակավայրում, համապատասխանաբար՝ Ստամբուլում, Թեհրանում, Բաղդադում և Ալեքսանդրիայում:

Գործունեության նշանակալիությունը: Սույն ենթաչափորոշիչով մեծ ներուժ ունեցող համայնքներ են համարվում նրանք, որոնք ունեն այնպիսի կազմակերպչական կառույցներ, որոնց գործունեությունը չի սահմանափակվում զուտ տեղական՝ համայնքային նշանակությամբ, այլ ունեն տարածաշրջանային և անգամ համազգային նշանակություն: Այն համայնքները, որոնց կազմակերպչական կառույցների գործունեությունը սահմանափակվում է զուտ տվյալ համայնքի շրջանակներում, դիտվել են որպես փոքր ներուժ ունեցողներ¹:

Սույն ենթաչափորոշիչով դասակարգելու պարագայում տեսնում ենք, որ միայն Լիբանանի հայ ավետարանական համայնքն է համապատասխանում մեծ ներուժ ունեցող համայնքի չափանիշներին: Բեյրութում է գտնվում Մերձավոր Արևելքի Հայ Ավետարանական եկեղեցիների միության գրասենյակը: Ելնելով այս հանգամանքից՝ կարելի է ասել, որ Լիբանանի մայրաքաղաքը Մերձավոր Արևելքի հայ ավետարանականության կենտրոնն է:

Բեյրութում է գործում նաև Սփյուռքի միակ բուհը՝ Հայկազյան համալսարանը: Չնայած այն ավետարանական կառույց է, սակայն այնտեղ, անկախ իրենց դավանանքային պատկանելությունից, ուսանելու են գալիս հայ երիտասարդներ ոչ միայն Լիբանանից, այլև աշխարհի գրեթե 20 երկրներից: Ավելին, համալսարանը, բացի համազգային նշանակությունից, ունի նաև միջազգային կրթական հաստատության կարգավիճակ, քանի որ այստեղ ուսանելու են գալիս նաև այլազգի երիտասարդներ, որոնք կազմում են բուհի ուսանողության մոտ կեսը: Իսկ համալսարանի կողմից հրատարակվող Հայկազյան հայագիտական հանդեսը բարձր հեղինակություն վայելող հայագիտական պարբերականներից է:

Տարածաշրջանային նշանակություն ունեցող կառույցներ են նաև Բեյրութում գտնվող Սիրիայի և Լիբանանի Հայ Ավետարանական եկեղեցի-

¹ Այս ենթաչափորոշիչով դասակարգման պարագայում միջին տարբերակ (միջին ներուժ ունեցող համայնք) չկա:

ների քրիստոնեական ջանից միությունը և Մերձավոր Արևելքի աստվածաբանական ճեմարանը:

Հանրագումարի բերելով առանձին ենթաչափորոշիչներով Մերձավոր Արևելքի հայ ավետարանական համայնքների վերլուծությունը՝ կարող ենք դրանք ըստ ներուժի վարկանիշավորել: Յուրաքանչյուր ենթաչափորոշիչով որպես մեծ ներուժ ունեցող համայնք գնահատվածներին կարելի է տալ 3, միջին ներուժ ունեցողներին՝ 2 և փոքր ներուժ ունեցողներին՝ 1 միավոր: Այս տրամաբանությամբ առանձին երկրների հայ ավետարանական համայնքների ներուժի հանրագումարային միավորը կգտնվի 6-18-ի սահմաններում, որում 18 միավորը ցույց է տալիս համայնքների առավելագույն ներուժը (բոլոր 6 ենթաչափանիշներով մեծ ներուժ ունեցող համայնքներ՝ 6 x 3 տրամաբանությամբ), իսկ 6 միավորը՝ համայնքների նվազագույն ներուժը (բոլոր 6 ենթաչափորոշիչներով փոքր ներուժ ունեցող համայնքներ՝ 6 x 1 տրամաբանությամբ):

Աղյուսակ 1

*Մերձավոր Արևելքի հայ ավետարանական համայնքների
վարկանիշավորումը և դասակարգումն ըստ ներուժի*

	Երկիր	Մարդկային չափորոշիչ		Կազմակերպչական չափորոշիչ				Հանրագ. միավոր
		Քանակ	Սկզբնականություն	Քանակ	Բազմազանություն	Սկզբնականություն	Գործ. նշանակալիությունը	
Մեծ ներուժ	Լիբանան	3	3	3	3	3	3	18
	Սիրիա	3	3	3	3	3	1	16
Միջին ներուժ	Իրան	2	3	2	3	1	1	12
	Թուրքիա	3	3	1	1	1	1	10
Փոքր ներուժ	Իրաք	1	1	2	2	1	1	8
	Եգիպտոս	1	1	1	1	1	1	6

Ըստ այդմ՝ 6-18 միավորանոց սանդղակում 6-9 միավորի միջակայքում գտնվող համայնքները համարվում են փոքր, 10-15 միավորի միջակայքում գտնվողները՝ միջին և 16-18 միավորի միջակայքում գտնվողները՝ մեծ ներուժ ունեցող համայնքներ:

Ինչպես ցույց է տալիս վարկանիշավորումը, մեծ ներուժ ունեցող համայնքներն են Լիբանանի և Սիրիայի հայ ավետարանական համայնքները՝ համապատասխանաբար 18 և 16 միավորներով: Իրանի և Թուրքիայի հայ ավետարանական համայնքները՝ համապատասխանաբար 12 և 10 միավորներով, համարվում են միջին, իսկ Իրաքի և Եգիպտոսի հայ ավետարանական համայնքները՝ համապատասխանաբար 8 և 6 միավորներով, փոքր ներուժ ունեցող համայնքներ (*Աղյուսակ 1*):

Համայնքների վրա ազդող գործոնները

Մերձավոր Արևելքի հայ ավետարանական համայնքները, գտնվելով բարդ և փոթորկահույզ տարածաշրջանում, իրենց վրա կրում են տարատեսակ գործոնների ազդեցությունը: Դրանք կարելի է բաժանել երկու մասի՝ բացասական և դրական:

Բացասական գործոնների ազդեցությունը թուլացնում է համայնքները՝ հանգեցնելով անգամ դրանց կազմալուծմանը: Որպես այդպիսիք կարելի է առանձնացնել 4-ը.

1. *Հայատյացություն*: Այս գործոնն ամենաակտիվ կերպով դրսևորվում է Թուրքիայում: Դեռևս հայկական կոտորածների և Ցեղասպանության տարիներին «...գրեթե առանց խտրականության՝ ոչնչացել են ինչպես հայ առաքելականները, այնպես էլ հայ կաթոլիկներն ու ավետարանականները» [6]:

Ցեղասպանությունից հետո էլ հայատյացության քաղաքականությունը շարունակեց տարածվել Հայության բոլոր դավանանքային հատվածների վրա, և հայ ավետարանականները Թուրքիայում ներկայումս էլ շարունակում են հալածանքների ենթարկվել իրենց հայ լինելու համար: Բազմաթիվ հայ ավետարանական գործիչներ, ինչպիսիք են, օրինակ, Հրանտ Դինքը, Հրանտ Գուզելյանը և այլք, ենթարկվել են հալածանքների (սպանություններ, դատական հետապնդումներ, սպառնալիքներ, ֆիզիկական

բռնություններ և այլն) իրենց ազգային գործունեության համար: Մասնավորապես, «Ակոս» շաբաթաթերթի գլխավոր խմբագիր Հրանտ Դինքի սպանությունը 2007թ. հունվարի 19-ին կապված էր զուտ իր մասնագիտության ոլորտում (լրագրություն) նրա ազգային գործունեության հետ: Ինչ վերաբերում է մեկ այլ ավետարանական գործչի՝ Հրանտ Գուգեյանի նկատմամբ ծավալված ազգային հալածանքներին, ապա դրա դրսևորումն էր այն, որ վերջինս 1982թ. մարտին 16-ամյա բանտարկության դատապարտվեց «հակաթուրքական քարոզչության» և «թուրք երեխաներին հայացնելու» մեղադրանքներով [2, p. 19]:

2. Իսլամական արմատականություն: Վերջին շրջանում Մերձավոր Արևելքի երկրներում, կապված կրոնի դերի մեծացման հետ, վերելք է ապրում իսլամական արմատականությունը: Այն առավելապես դրսևորվում է հակաքրիստոնեական պայքարի տեսքով՝ աստիճանաբար ավելի հակաքրիստոնեական երանգավորում ստանալով: Իսլամական արմատականությունն առավել մեծ թափով դրսևորվում է այն երկրներում, որոնք սուր հակադրության մեջ են Արևմուտքի հետ (Իրան, Իրաք): Այս դեպքում արդեն կրոնական պայքարը համեմվում է քաղաքական բովանդակությամբ՝ ստանալով քաղաքական երանգավորում ու մոտիվացիա:

Իսլամական արմատականության վերելքը զգալիորեն վատթարացնում է քրիստոնյա փոքրամասնությունների դրությունը: Այն դրսևորվում է պետական և ոչ պետական մակարդակներում քրիստոնյաների նկատմամբ հալածանքների և հետապնդումների տեսքով՝ հարձակումներ, սպանություններ, գույքի թալան և այլն: Այս պայմաններում լրջորեն վտանգվում է անգամ նրանց ֆիզիկական անվտանգությունը: Թե ինչպիսին է իսլամական արմատականության վերելքի պայմաններում քրիստոնյաների դրությունը, ցցուն կերպով նկարագրել է Դ.Ուրուշը. «*Հուսեյնի վարչակարգի անկումից հետո քրիստոնյաների դրությունը (Իրաքում- Վ.Հ.) նկատելիորեն վատացել է: Այժմ նրանք դարձել են Ջորջ Բուշի արտաքին քաղաքականության պատանդները. նրանց դիտում են որպես Արևմուտքի դաշնակիցներ, Իրաքի և իսլամի թշնամիներ: Ծայրահեղականները հաճախ հարձակվում են քրիստոնյաների տների ու խանութների վրա: Հատուկ խտրա-*

կանության են ենթարկվում այն քրիստոնյա կանայք, որոնք փողոց են դուրս գալիս առանց մուսուլմանական գլխաշորերի, և դառնում են ծաղրի ու սպառնալիքների օբյեկտ: Շատ հիվանդանոցներում հրաժարվում են բուժել հիջաբ չհագած կանանց»¹:

Ներկայումս Մերձավոր Արևելքում շարունակվում է իսլամական արմատականության վերելքի միտումը: Մասնագետների գնահատմամբ՝ 2011թ. «արաբական գարունը» իսլամի վերելքի արդյունք էր, քանի որ արաբական որոշ երկրներում աշխարհիկ վարչակարգերը տապալվեցին՝ փոխարինվելով իսլամիստական ուղղվածությամբ վարչակարգերով [7, էջ 8]:

3. *Հակազդեցություն միսիոներական գործունեությանը:* Այս գործոնը հատկապես ակտիվ է դրսևորվում Թուրքիայում և Իրանում, որտեղ ակտիվ կերպով ծավալվում է միսիոներական գործունեություն: Համաձայն Թուրքիայի հատուկ ծառայությունների կանխատեսումների՝ միսիոներական գործունեության արդյունքում 2020թ. Թուրքիայում քրիստոնեություն ընդունածների քանակը կկազմի բնակչության 10%-ը [8, էջ 39]: Իսկ ըստ Միջազգային անտիոքյան հովվություն (*International Antioch Ministries*) միսիոներական կազմակերպության, որը նպատակ ունի Իրանում քրիստոնյաների թվաքանակը հասցնել նույնպես բնակչության 10%-ի, այդ երկրում քրիստոնյաների թվաքանակն արդեն կազմում է 500 հազարից 1 մլն մարդ²:

Միսիոներական ակտիվ գործունեությունը թե՛ Թուրքիայում և թե՛ Իրանում ծնում է կոշտ հակազդեցություն թե՛ պետության և թե՛ իսլամական ծայրահեղականների կողմից, քանի որ երկու երկրներում էլ այն դիտվում է որպես սպառնալիք պետության անվտանգությանը: Պետական մակարդակով հակազդեցությունը դրսևորվում է նրանով, որ, օրինակ, Իրանում պետականորեն արգելված է միսիոներությունը, իսկ կրոնափոխության համար նախատեսված է մահապատիժ: Իսկ ոչ պետական մակարդակով հակազդեցությունը դրսևորվում է իսլամիստ ծայրահեղականների կողմից քրիստոնյա միսիոներների նկատմամբ իրականացված բռնու-

¹ Дмитрий Урушев, Заложники политики Хусейна и Буша: Христианам нет места в «свободном» Ираке <http://rusk.ru/st.php?idar=710130>

² В Иране начинается христианское пробуждение? <http://www.invictory.org/news/story-11884.html>

թյուններով (սպառնալիքներից ընդհուպ մինչև սպանություններ), որը գուցորդվում է իրավապահ մարմինների կողմից այդ հանցագործությունները բացահայտելու «անկարողությամբ» կամ դատարանների կողմից հանցագործների նկատմամբ մեղմ վճիռներով [տե՛ս, օրինակ, 8, էջ 39-44]:

Ե՛վ Թուրքիայում, և՛ Իրանում միսիոներական գործունեության նկատմամբ հակազդեցությունից տուժում են նաև տեղի հայ ավետարանականները: Մասնավորապես, ըստ որոշ ենթադրությունների՝ 2007թ. ապրիլի 18-ին Մալաթիայի «Զիրվե» հրատարակչատանը թուրք ազգայնամոլների կողմից դաժանաբար սպանված երեք բողոքականներից երկուսը վերաքրիստոնեացած, նախկինում բռնի իսլամացված հայերի սերունդներ էին [տե՛ս 9, էջ 12-13]:

Ինչ վերաբերում է Իրանին, ապա այստեղ նույնպես հայ ավետարանականները որոշակիորեն ներգրավված են միսիոներական գործունեության մեջ, քանի որ միսիոներությունը ենթադրում է նաև տեղական կադրերի (միսիոներների, քարոզիչների) «արտադրություն» և գործարկում: Հետևաբար, նրանք նույնպես հայտնվում են միսիոներության դեմ պայքարի թիրախում: Մասնավորապես, 1994թ. սպանվել են երկու հայ ավետարանական գործիչներ՝ Հայկ Հովսեփյան Մեհրը և Թաթևոս Միքայելյանը¹: Չի բացառվում, որ սպանություններն իրականացվել են իսլամիստ ծայրահեղականների կողմից՝ կապված նրանց կրոնական գործունեության հետ:

Ներկայումս էլ վտանգը շարունակվում է: Հետևաբար, Իրանի հայ ավետարանականներից պահանջվում է առավելագույն զգոնություն և շրջահայացություն: Խնդիրը չի վերաբերում միայն վերջիններիս անվտանգությանը: Բանն այն է, որ հայ ավետարանականների նկատմամբ իսլամիստ ծայրահեղականների ատելությունն ու թշնամանքը կարող են տարածվել ընդհանուր հայ համայնքի վրա՝ վտանգելով նաև հայ-իրանական հարաբերությունները:

4. Քառսային իրավիճակ: Ինչպես արդեն նշվել է, ներքին և արտաքին պատերազմները գրեթե մշտական երևույթ են Մերձավոր Արևելքի երկրներ-

¹ Minority Rights Group International, *World Directory of Minorities and Indigenous Peoples - Iran: Christians*, 2008 <http://www.unhcr.org/refworld/docid/49749d0b2d.html>

րի համար: Դրանք թեև անմիջականորեն չեն հարվածում հայ ավետարանական համայնքներին, սակայն իրենց բացասական ազդեցությունը թողնում են անուղղակիորեն: Այդ փոթորկահույզ իրադարձությունները ծնում են քառս, որն էլ հանգեցնում է հանցագործությունների աճի, միջէթնիկ բախումների, ահաբեկչության աճի, բախումների պետական անվտանգության ուժերի և տարատեսակ զինված խմբավորումների միջև և այլն: Այս ամենի հետևանքով էլ տարածաշրջանի երկրների ընդհանուր բնակչության հետ մեկտեղ տուժում են նաև հայ ավետարանական համայնքները: Օրինակ, Բաղդադում 2008թ. սեպտեմբերի 28-ին Իրաքի անվտանգության ուժերի և մի խումբ զինյալների միջև բախման հետևանքով հրդեհվել է տեղի Հայ Ավետարանական եկեղեցին, որի հետևանքով այն մեծ վնասներ է կրել¹:

Այս բոլոր բացասական գործոնների ազդեցության գլխավոր հետևանքը արտագաղթն է, որը հանգեցնում է հայ ավետարանական համայնքների թուլացմանը և անգամ կազմալուծմանը: Օրինակ, նախկինում Եգիպտոսում հայ ավետարանական համայնքներ եղել են մայրաքաղաք Կահիրեում և Ալեքսանդրիայում: Արտագաղթի հետևանքով Կահիրեի հայ ավետարանական համայնքը սպառվել է, և ներկայումս Եգիպտոսում առկա է միայն Ալեքսանդրիայի՝ խիստ սահմանափակ թվով հայ ավետարանական համայնքը [մանրամասն տե՛ս 10, էջ 44-45]:

Դրական գործոնները, ի տարբերություն բացասականների, նպաստում են համայնքների կյանքի աշխուժացմանը՝ բարձրացնելով նրանց կենսունակությունը: Որպես այդպիսիք կարելի է առանձնացնել հետևյալները.

1. Միսիոներությունը: Մերձավոր Արևելքում վերջին շրջանում լայն թափ ստացած բողոքական միսիոներությունը, նպաստելով տարածաշրջանում ընդհանրապես ավետարանականության տարածմանն ու ամրապնդմանը, դրանով իսկ նպաստում է նաև հայ ավետարանական համայնքների կենսունակության ամրապնդմանը: Միսիոներական կառույցների հետ համագործակցությունը, նրանց կողմից ստացված օգնությունը դրական ազդեցություն են ունենում հատկապես փոքր ներուժ ունե-

¹ Պաղատաի Հայ Ավետարանական եկեղեցին՝ հրոյ ճարակ, <http://asbarez.com/arm/54093/>

ցող և խոցելի համայնքների վրա: Այդպիսի համագործակցության օրինակ է 2008թ. փետրվարին Բաղդադի արաբալեզու մկրտական ռադիոկայանով հայ ավետարանական հոգևոր ռադիոծրագրի հիմնումը, որը հայերենով եթեր է հեռարձակվում օրական 30 րոպե տևողությամբ: Ռադիոծրագրի հիմնումը իրադարձություն էր Իրաքի հայ համայնքի համար ընդհանրապես, քանի որ այն առաջին հայալեզու հեռարձակումն էր Իրաքում¹:

2. Արտերկրի կամ համաշխարհային հայ ավետարանական կազմակերպությունների կողմից ստացված օգնությունը: Այս տեսակետից անգնահատելի են Ամերիկայի Հայ Ավետարանական ընկերակցության դերն ու նշանակությունը մերձավորարևելյան հայ ավետարանական համայնքների պահպանման և ամրապնդման գործում: Մասնավորապես, ընկերակցությունն է հոգում Բաղդադի Հայ Ավետարանական եկեղեցու շենքի վարձակալության ծախսերը: Իսկ 2008թ. սեպտեմբերին եկեղեցում բռնկված հրդեհից հետո ընկերակցությունը կազմակերպեց հանգանակություն այն վերանորոգելու համար²:

3. Համագործակցությունը հայ առաքելական և կաթողիկե համայնքների հետ: Մերձավոր Արևելքի հայ ավետարանական համայնքների կյանքում ամենադրական գործոնը, որը նպաստում է բարդագույն իրավիճակում հայտնված համայնքների կենսունակությանը, միջդավանական համագործակցությունն է ինչպես հայ առաքելական, այնպես էլ հայ կաթողիկե համայնքների հետ: Հայ առաքելական, կաթողիկե և ավետարանական համայնքների միջև միջդավանական համագործակցությունը ոչ միայն օգնում է համատեղ ուժերով լուծելու ընդհանուր խնդիրները, փոխօգնության գնալու միմյանց տարբեր հարցերում, այլև Սփյուռքում ազգային համախմբման լավագույն դրսևորում է:

¹ St' u First Anniversary for the Daily Armenian Radio Program in Iraq

<http://www.chanitz.org/2009/03/first-anniversary-for-daily-armenian.html>; Իրաքի Հայ Աւետ. Եկեղեցիի Հոգևոր Բաժնի Ժամի Ծարայութիւնը http://www.chanitz.org/2011/05/radio-service-of-armenian-evangelical.html?utm_source=feedburner&utm_medium=feed&utm_campaign=Feed%3A+ArmenianEvangelicalEmmanuelChurch-ChanitzYouth+%28ARMENIAN+EVANGELICAL+EMMANUEL+CHURCH+-+CHANITZ+YOUTH%29

² Պաղտատի Հայ Աւետարանական եկեղեցին՝ հրոյ ճարակ, <http://asbarez.com/arm/54093/>

Միջդավանական համագործակցության մակարդակները և ձևերը

Մերձավոր Արևելքի հայ համայնքներում միջդավանական համագործակցությունը ծավալվում է հասարակական կյանքի ամենատարբեր բնագավառներում՝ քաղաքական, սոցիալական, գիտամշակութային և այլն: Այն դրսևորվում է երկու մակարդակով՝ անհատական և ինստիտուցիոնալ:

1. *Անհատական* մակարդակով միմյանց հետ ակտիվ շփումների և համագործակցության մեջ են գտնվում տարբեր դավանական շերտերին պատկանող անհատ հայեր: Այս մակարդակով միջդավանական համագործակցությունը դրսևորվում է հետևյալ հիմնական ձևերով.

Աշխարհիկ կառույցներում տարբեր դավանական շերտեր ներկայացնող անհատ հայերի ընդգրկվածություն: Աշխարհիկ կառույցները, ինչպիսիք են հայ քաղաքական կուսակցությունները, բարեգործական, մշակութային, կրթական և մարզական հաստատությունները, իրենց գործունեությամբ իրականացնում են ազգային համախմբման գործառույթ, քանի որ նրանց գործունեության մեջ ընդգրկվում են հայ համայնքների բոլոր, այդ թվում նաև դավանական շերտերը: «Հայկական Բարեգործական Ընդհանուր Միութեան ներկայությամբ, - գրում է Հ. Չոլաքյանը, - Անտիոքի շրջանի միւս գիւղերուն պարագային, ինչպէս Քեսապ, բարերար դեր ունեցած է տարբեր համայնքներու զաւակները նոյն մասնաճիւղին մէջ առնելու եւ անոնց մէջ ազգային դաստիարակութեան ընդհանուր նկրտումներ ապահովելու տեսակէտէն: Հայ լուսաւորչականին հետ նոյն մասնաճիւղին մէջ մտած են նաեւ բողոքականը, կաթողիկէն եւ նոյնիսկ՝ լատինը» [11, էջ 187]:

Աշխարհիկ միջոցառումներին համատեղ մասնակցություն: Այդպիսի միջոցառումներ են գիտաժողովները, ցուցահանդեսները, համերգները, բողոքի ակցիաները և այլն: Օրինակ, Դամասկոսում ՌԱԿ կլոր տարեդարձերին նվիրված միջոցառումներին, որպէս կանոն, հրավիրվում են «...անձնավորություններ, որոնք հայ ազգին մատուցել են գնահատելի ծառայություններ՝ առանց նկատի ունենալու նրանց կուսակցական պատկանելությունը կամ դավանանքը» [12, էջ 49]:

2. *Բնատիտուցինալ* մակարդակով միջդավանական համագործակցությունը ծավալվում է Հայ Առաքելական, Կաթողիկե և Ավետարանական եկեղեցիների՝ որպես ինստիտուտների, կամ նրանց առանձին կառույցների միջև: Այն դրսևորվում է հետևյալ հիմնական ձևերով.

Համատեղ կառույցների ստեղծում և տնօրինում: Համագործակցության սույն ձևը բնորոշ է հատկապես սոցիալական ոլորտին, որը միշտ էլ նշանակալից, եթե ոչ առաջնային տեղ է ունեցել Մերձավոր Արևելքի հայ համայնքներում միջդավանական համագործակցության ասպարեզում: Շատ սոցիալական կառույցներ (Ազունիեի առողջարանը Լիբանանում, Հովարդ Կարագյոզյան հաստատության Սիրիայի մասնաճյուղը և այլն) ստեղծվել և կառավարվում են համատեղ [մանրամասն տե՛ս 13, էջ 56-57; 14, էջ 50]:

Համատեղ միջոցառումների կազմակերպում: Համագործակցության այս ձևն ակտիվ դրսևորվում է տարբեր բնագավառներում: Օրինակ, քաղաքական բնագավառում ամեն տարի ապրիլի 24-ին Մեծ եղեռնի զոհերի հիշատակի ոգեկոչման արարողությունները կազմակերպվում և իրականացվում են հայկական երեք դավանական համայնքների կողմից համատեղ:

Գիտամշակութային ոլորտում նման համագործակցության ուշագրավ օրինակ է Սիրիայի հայ համայնքում հայ գրերի ստեղծման 1600-ամյակի, Հայաստանում քրիստոնեության պետական կրոն ընդունման 1700-ամյակի և այլ կարևոր տարեդարձերի համատեղ նշումը [12, էջ 24]:

Մեկ համայնքի կողմից կազմակերպված միջոցառումներին մյուսների մասնակցություն: Համագործակցության սույն ձևը փաստող օրինակներ են.

- 2005թ. Հայկազյան համալսարանի 50-ամյակին նվիրված տոնակատարությանը մասնակցեցին նաև Հայ Առաքելական և Կաթողիկե եկեղեցիները՝ ի դեմս Լիբանանի հայոց թեմի առաջնորդ Գեղամ եպս. Խաչերյանի և Հայ կաթողիկե պատրիարքության ընդհանուր փոխանորդ Վարդան եպս. Աշգարյանի [15]:
- 2009թ. հոկտեմբերի վերջին Մեծի Տանն Կիլիկիո կաթողիկոսությունում կազմակերպված համագումարին՝ նվիրված Ադանայի ջարդերի 100-ամյակին, զեկույցներով հանդես եկան Հայ Կաթողիկե և Ավետարանական եկեղեցիների ներկայացուցիչները՝ ի դեմս, համապատաս-

խանաբար, Անդրանիկ վարդապետ Կոստանյանի և Սիրիայի հայ ավետարանականների համայնքապետ, վերապատվելի Հարություն Սելիմյանի [տե՛ս 6]:

Համազգային միջոցառումներին հայկական երեք հարանվանությունների մասնակցություն: Համազգային միջոցառումները նույնպես ազգային համախմբման ներուժ ունեն: Այդ միջոցառումներին մասնակցում են Մերձավոր Արևելքի հայ համայնքների երեք դավանանքային շերտերն էլ՝ ի դեմս իրենց ինստիտուցիոնալ կառույցների: Օրինակ, 2010թ. մարտի 22-24-ը ՀՀ նախագահ Ս.Սարգսյանի Սիրիա կատարած պաշտոնական այցի ընթացքում տեղի Հայ Առաքելական, Կաթողիկե և Ավետարանական եկեղեցիների առաջնորդներն ուղեկցում էին նրան և համատեղ մասնակցում նախատեսված միջոցառումներին [մանրամասն տե՛ս 14, էջ 50]:

Համատեղ պայքար ընդհանուր խնդիրների լուծման համար: Փորձը ցույց է տվել, որ Հայ առաքելական, կաթողիկե և ավետարանական համայնքների միջև սերտ համագործակցությունն ընդհանուր խնդիրների լուծման ուղղությամբ տալիս է ցանկալի արդյունք: Օրինակ, Սիրիայում 1970-ական թթ. Հայ Առաքելական, Կաթողիկե և Ավետարանական եկեղեցիները համատեղ պայքարի միջոցով կարողացան հայկական դպրոցների համար ձեռք բերել մայրենի լեզվի ուսուցման, ինչպես նաև կրոնագիտության դասընթացները հայերենով անցկացնելու բացառիկ իրավունքը [տե՛ս 14, էջ 51; 12, էջ 15]:

Հայ Առաքելական, Կաթողիկե և Ավետարանական եկեղեցիների միջև միջդավանական համագործակցության նոր հորիզոն է բացում Թուրքիայում պետության կողմից բռնագրավված քրիստոնեական փոքրամասնություններին պատկանող գույքի վերադարձի հարցը: 2011թ. հունիսի 15-ին ԱՄՆ Կոնգրեսի Ներկայացուցիչների պալատն ընդունեց 306-րդ բանաձևը, որը կոչ է անում Թուրքիային «*իրենց օրինական տերերին վերադարձնել բոլոր քրիստոնեական եկեղեցիները և այլ պաշտամունքի վայրերը, վանքերը, դպրոցները, հիվանդանոցները, հուշարձանները, մատուռները, սրբավայրերը և այլ կրոնական գույքը, ներառյալ շարժական գույքը, ինչ-*

պիսիք են արվեստի գործերը, ձեռագրերը, զգեստները, անոթները և այլ իրերը» [16]: Նույն թվականին Թուրքիայում նույնպես կայացվեց որոշում բռնագրավված եկեղեցապատկան գույքի վերադարձի մասին:

Եկեղեցապատկան գույքի հետ ստացումը բարդ գործընթաց է և պահանջում է ջանքերի համատեղում: Եվ պատահական չէր 2012թ. փետրվարի 23-26-ը Անթիլիասում «Հայկական ցեղասպանությունը՝ ճանաչումից հատուցում» խորագրով միջազգային գիտաժողովի փակման խոսքում այս առնչությամբ Մեծի Տանն Կիլիկիո կաթողիկոս Արամ Ա-ի հայտարարությունը, որ «Մեծի Տանն Կիլիկիոյ Կաթողիկոսութիւնը, Հայ Կաթողիկէ ու Բողոքական եկեղեցիներուն եւ մեր կուսակցութիւններուն հետ գործակցաբար յառաջիկային պիտի պատրաստէ աշխատանքային ծրագիր» [17, էջ 116]:

Հայ ավետարանականները՝ քաղաքական, քաղաքակրթական և ազգային գործուն

Մերձավոր Արևելքի հայ ավետարանական համայնքները, հաշվի առնելով նրանց ներուժը և գործունեության ուղղությունները, կարելի է դիտել որպես քաղաքական, քաղաքակրթական և ազգային գործուն, որոնցից յուրաքանչյուրում նրանք գործում են կոնկրետ ուղղություններով՝ որոշակի խնդիրների լուծման համար:

Քաղաքական բնագավառում նրանց գործունեության ուղղությունները հետևյալն են.

1. *Հայոց ցեղասպանության հարցի արծարծում*: Այս խնդրի ուղղությամբ հայ ավետարանականների գործունեությունը հատկապես աչքի է զարնում Թուրքիայում, որտեղ, չնայած համատարած վախի և հալածանքների մթնոլորտին, հայ ավետարանականներն աչքի են ընկնում ազգային հարցերի արծարծման բնագավառում առավել նախանձախնդրությամբ [մանրամասն տե՛ս 18, էջ 24, 25]:
2. *Հայադարձություն*: Ավետարանական հայերի գործունեությունը Մերձավոր Արևելքում Հայության համար նշանավորվում է նաև ուժացման տարբեր մակարդակներում գտնվող հայերի հայադարձության տեսանկյունից, քանի որ նրանց իրականացրած հոգևոր-քարոզ-

չական գործունեության արդյունքում ազգային ինքնությունից հեռացած հայերի մեջ կրկին վերականգնվում է հայկական ինքնագիտակցությունը: Այս երևույթը նույնպես առավել մեծ չափով տեղի է ունենում Թուրքիայում [մանրամասն տե՛ս 18, էջ 25-26]: Բանն այն է, որ բռնի իսլամացման հետևանքով նաև ազգային արմատներից հեռացած հայության ամենամեծ հատվածը բնակվում է ժամանակակից թուրքական հանրապետության տարածքում (Արևմտյան Հայաստան, Կիլիկիա և այլն), քանի որ հայերի բռնի իսլամացումն առավել զանգվածաբար իրականացվել է Հայոց ցեղասպանության տարիներին [տե՛ս 19, էջ 7-45]: Իսկ հայադարձության ուղղությամբ Թուրքիայում գործադրվող ջանքերի մասին Ստամբուլի Գեդիքփաշա թաղամասի Հայ Ավետարանական եկեղեցու հոգևոր հովիվ, վերապատվելի Գրիգոր Աղաբալօղլուն վկայում է. «...մենք գաւառներուն մէջ աշխատանք կը տանինք, հաւատքի և կրօնին զօրութեամբ մեր արմատներուն, մեր պատմութեան հետ առնչակից դարձնել բոլոր այն հայերը, որոնք այսօր, կամքէ անկախ պատճառներով, հեռացած են մեզմէ» [20]:

Քաղաքակրթական ասպարեզում հիմնական դերակատարը Բեյրութի Հայկազյան համալսարանն է: Նրա գործունեությունը մեծ զարկ է տալիս Մերձավոր Արևելքում հայկական և համաշխարհային քաղաքակրթության պահպանման և զարգացման գործին: Ընդհանուր առմամբ, համալսարանի կողմից լուծվում են հետևյալ երկու հիմնական խնդիրները.

1. Հայագիտության զարգացում: Համալսարանն աշխարհի խոշորագույն հայագիտական կենտրոններից է: Նրա հայագիտության ամբիոնում ուսուցանվում են հայոց լեզու, գրականություն, պատմություն¹, իրականացվում են հետազոտություններ այդ և այլ հայագիտական ոլորտներում: Իսկ համալսարանի կողմից հրատարակվող Հայկազյան հայագիտական հանդեսում տպագրվում են հայագիտության տարբեր խնդիրներին նվիրված նյութեր:

¹ <http://www.haigazian.edu.lb/Pages/MajorDetails.aspx?Id=65>

2. *Գիտության այլ ճյուղերի զարգացում*: Համալսարանում բացի կրոնագիտությունից դասավանդվում և զարգացվում են նաև գիտության այլ ճյուղեր¹, որով համալսարանն իր նպաստն է բերում նաև համաշխարհային քաղաքակրթության զարգացմանը:

Ազգային հարցերում հայ ավետարանականները Մերձավոր Արևելքում կոչված են լուծելու հետևյալ հիմնական խնդիրները.

1. *Հայապահպանություն*: Հանգամանքների բերումով հայ ավետարանականներն առավել նախանձախնդիր են ազգային ինքնության պահպանման հարցում: Խնդիրը, թերևս, ունի հոգեբանական կողմ: Բանն այն է, որ նրանք խնդիր ունեն ապացուցելու ազգային ինքնությանն իրենց հավատարմությունը, քանի որ այլոց կողմից հաճախ ընկալվում են որպես Հայությունից օտարացած հատված: Հակառակն ապացուցելու ձգտումը մղում է հայ ավետարանականներին ավելի ամուր փարված մնալ ազգային ինքնության այնպիսի բաղադրիչների, ինչպիսիք են մայրենի լեզուն, ազգային մշակույթը, ազգային խնդիրների լուծմանը նպաստելը և այլն:
2. *Ազգային համախմբում*: Հայ ավետարանական համայնքների կողմից Մերձավոր Արևելքում հայ ազգային համախմբմանը նպաստելը լավագույնս երևում է նրանց կրթական կառույցների գործունեությամբ: Վերջիններս միշտ էլ բաց են եղել այլ դավանանքի հետևող՝ առաքելական և կաթողիկե հայ երեխաների համար: Դա ավանդական երևույթ է Մերձավոր Արևելքի հայ համայնքներում: Համաձայն Մերձավոր Արևելքի հայ ավետարանական կիրակնօրյա վարժարանների մասին 1947-48թթ. տեղեկագրի՝ 29 վարժարաններում 2700 աշակերտների միայն 54%-ն էր ավետարանական: 41%-ը լուսավորչական էր, իսկ մնացած 5%-ը պատկանում էր այլ հարանվանությունների [21, էջ 358-359]:

¹ Տե՛ս <http://www.haigazian.edu.lb/Academics/Pages/UndergraduatePrograms.aspx>

Ինչ վերաբերում է Սփյուռքի միակ բուհին՝ Բեյրութի Հայկազյան համալսարանին, ապա այստեղ ուսանողությունից զատ դասախոսական ու վարչական աշխատողների կազմում ևս կան հայ առաքելականներ ու կաթողիկոսներ¹:

Ապրիլ, 2012թ.

Աղբյուրներ և գրականություն

1. Հայ սփյուռք հանրագիտարան, Երևան, Հայկական հանրագիտարան հրատարակություն, 2003:
2. *Tessa Hofmann*, Armenians in Turkey Today: A Critical Assessment of the Situation of the Armenian Minority in the Turkish Republic, Bruxelles, 2002.
3. *Акопян А.*, О чем молчит Адама, Ноев Ковчег, № 01, Январь, 2010.
4. *Մանուկյան Մ.*, Իրանահայ գաղթօջախի առօրյան, Երևան, 2000:
5. *Հովյան Վ.*, Իրանի հայ բողոքական համայնքը, Գլոբուս. Ազգային անվտանգություն, 2010, # 5:
6. Ալիք, 01.11.2009:
7. *Հարությունյան Գ.*, «Արաբական գարնան» հետևանքները, Գլոբուս. Ազգային անվտանգություն, 2012, # 1:
8. *Խաչիկյան Տ.*, Միսիոներությունը Թուրքիայում, Կրոն և հասարակություն, 2009, դեկտեմբեր, # 9:
9. *Մելքոնյան Ռ.*, Կրոնական հալածանքների նոր ալիք Թուրքիայում (Մալաթիայի սպանդի շուրջ), Հանրապետական, 2007, # 5:
10. *Հովյան Վ.*, Եգիպտոսի հայ ավետարանական համայնքը, Գլոբուս. Ազգային անվտանգություն, 2011, # 3:
11. *Չոլաքեան Յ.*, Անտիոքի մերձակա Ռուճի հովիտի հայերը, Անթիլիաս, 2006:
12. *Փաշայան Ա.*, Դամասկոսի հայ համայնքը. ներկան և հեռանկարը, «Նորավանք» ԳԿՀ տեղեկագիր, 2008, թիվ 23:
13. *Հովյան Վ.*, Լիբանանի հայ բողոքական համայնքը, 21-րդ դար, 2010, # 4:
14. *Հովյան Վ.*, Սիրիայի հայ ավետարանական համայնքը, Գլոբուս. Ազգային անվտանգություն, 2010, # 4:
15. Ազգ, 06.07.2005:
16. *H. Res*, Resolution 306 Urging the Republic of Turkey to Safeguard its Christian Heritage and to Return Confiscated Church Properties, June 15, 2011.
17. Հասկ, 2012, փետրուար, թիվ 2:
18. *Հովյան Վ.*, Թուրքիայի հայ բողոքական համայնքը, Գլոբուս. Ազգային անվտանգություն, 2010, # 3:

¹ St u Ливанские эскизы, <http://aniv.ru/view.php?numer=16&st=2>

19. Մելքոնյան Ռ., Հայերի բռնի իսլամացումը ցեղասպանության տարիներին. ընթացքը և հետևանքները, Եր., Հեղինակային հրատարակություն, 2010:
20. Ազդակ, 09.06.2009:
21. Ատանալեան Կ., Յուշարձան Հայ աւետարանականաց եւ աւետարանական եկեղեցւոյ, Ֆրեզնո, 1952:

АРМЯНСКИЕ ЕВАНГЕЛИЧЕСКИЕ ОБЩИНЫ БЛИЖНЕГО ВОСТОКА

Ваграм Овян

Резюме

По своему потенциалу армянские евангелические общины Ближнего Востока делятся на три типа: большие, средние и маленькие. К евангелическим общинам с большим потенциалом относятся общины Ливана и Сирии, средним – Ирана и Турции, маленьким – Ирака и Египта. Находясь в сложном регионе, армянские евангелические общины подвергаются разным положительным и отрицательным воздействиям. В качестве негативных факторов особенно значимы армянофобия (Турция), исламский радикализм (Ирак, Иран), противодействие миссионерству (Турция, Иран), внутренние и внешние войны (Ливан, Сирия, Ирак, Иран, Египет).

В качестве положительных факторов выступают миссионерство, помощь, получаемая из-за рубежа или от всемирных армянских евангелических организаций, и самое главное – межконфессиональное сотрудничество с армянскими апостольскими и католическими общинами.

Армянские евангелические общины выступают на Ближнем Востоке в политической (озвучивание вопроса о Геноциде армян, обращение к своим национальным истокам), цивилизационной (сохранение и развитие армянской и мировой цивилизации) и национальной (сохранение армянства, национальная консолидация) сферах.